

Donkam ia ki Iingshari ba kyrpang na bynta ki kam batbor : Kong Theilin

Shillong, Rymphang 08

"Ngi donkam ia ki Iingshari ba kyrpang (Special Court) na bynta ki kam (case) batbor khnang ba ki jingbisha kin ia id shakhmat bad yn ym sah kut hajuh," ong ka Kong Theilin Phanbuh, Chairperson ka Meghalaya State Commission for Women



Kong Theilin Phanbuh

(MSCW).

Haba kren shaphang ki kam batbor kiba la nang jyllei hapoh ka jylla katba dang mih ki sngi, ka Kong Theilin haba iakren bad u nongthoh khubor mynta ka sngi, ka la ong, "Nga sngewkhia shi kat dei eh ia kine ki jingjia, hynrei ...**Pule Sla 9**

kaei kaba sngewsih ka long ba bun na ki runar kiba ju mlien ban leh ia kitei ki kam, kim ju da kham shah pynshitom bad ki lait noh da kaba suk."

"Kaei kaba ngi donkam eh mynta ka long ia ki 'public prosecutor' (nongiasaid aiñ ba la thung da ka sorkar) kiba khlain, ha kaju ka por kiba tista bad trei minot ia la ka kam," ka la ong.

Haba kylli ia ka Kong Phanbuh halor ka jingshah pyniap ki ar ngut ki heprit bad kawei ka longkmie ha ka thaiñ Ri-lum Jaiñtia dang myn ha kine ki khyndiat sngi ba lah dep, ka Chairperson ka MSCW, ka la iathuh ba kitei ki jingjia ki long ki bym lah satia ban pdiang ha ka imlang sahlang bad ka la ong ruh ba ki don shibun ki kam batbor ha Jaiñtia Hills, hynrei kito ki longkmie ne ki khyllung khynnah kiba la ngat ha kiba kum kitei ki apot, kim nud satia ban wan mih shakhmat bad iathuh ia la ki jingjia.

"Ka daw ba hakmat eh ha kaba iadei bad ki kam batbor ka dei namar ba bun na kito kiba leh ia kitei ki kam sang ki dei ki ju mlien ban pynbyrngia ialade ha ki phlim jaboh lyngba ka kor treikam jong ka 'internet.' Kan jin da long kaba bha na kiba bha tam lada lah ban khang (block) noh ia ki 'site' kiba ju pyni ia kiba kum kitei ki jait phlim. Kiwei ki daw ki lah ban kynthup ia ka jingdih drok, kyiad bad kiwei kiwei ki jingdih ba pynbuaid," ong ka Kong Theilin.

Ka la iathuh ba kawei na ki lad ki lynti ban teh lakam ia kitei ki jingsniew pyrshah ia ki 'riew kynthei ka long sa tang ka jingiatrei lang na ka liang ka shnong, ki seng kynthei, bad ruh ka sorkar.

Katei ka khliehduh ka MSCW ka la pynpaw ba bun na ki 'case' ba iadei bad ki kam batbor, ki ju ia id lyngba ki 'District Council Court' bad namar kiba bun ki jyrwit jyrwat, lehse kum ka jingbym shimkhia, bun na kitei ki 'case' ki sah kut sah khlem poi shano shano, pynban ha kawei ka liang ka nang ai mynsiem ia ki nongleh ban iai bteng ia ki kam sniew jong ki.

"Kumta lah dei ban wanrah ia kiba kum kine ki jait 'case' ha ki 'District Court' ne lada long kaba lah ban thaw na ki Iingshari ba kyrpang na bynta jong ki," ong ka Kong Phanbuh.

Ka la ong ruh, "Ka jingpynshitom ka dei ban ia id katkum ka aiñ, hynrei haba phai sha ka jingshah batbor ki khyllung khynnah, kata dei ban set patok shi jingim."

Shuh shuh ka Kong Theilin ka la bynrap ba ki 'case' thombor pyrshah ia ki 'riew kynthei kiba ka MSCW ka la iohpdiang myn ha u snem ba lah dep, ki long kumba 103 tylli ei ei.